

經

韵

樓

集

經韵樓集卷十二

金壇段玉裁若膺

與顧千里書論學制備忘之記

千里足下承示學制備忘之記云王制移之郊如初禮鄭注爲之習禮於郊學愚據爲虞庠在國四郊之證此二經如風馬牛之不相及不意遭此附會紐合從未有鄉射鄉飲酒而行於虞庠小學者也足下心苦分明者在是愚竊以爲未安聖人以禮教天下莫重於祀禮陽禮故爲十有二教之首飲射相因而及鄉飲有不鄉射者鄉射未有不先以鄉飲者故鄉飲爲尤重戴記言鄉

飲酒鄉射省文曰射鄉如射鄉之禮所以仁鄉黨也又
尊於朝聘和於射鄉又射鄉食饗所以正交接也又習
射上功習鄉上齒皆是也言鄉飲酒鄉射省文曰鄉故
王制曰六禮冠昏喪祭鄉相見言鄉飲酒之省文亦曰
鄉故鄉飲酒義曰吾觀於鄉而知王道之易易言鄉飲
酒禮則省文曰禮故周禮鄉大夫曰以禮禮賓之州長
曰以禮會民而射於州序黨正曰以禮屬民而飲酒於
序先儒謂鄉飲酒其用有四謂鄉大夫之賓興賢能州
長射於州序黨正以正齒位卿大夫士飲國中賢者皆
用之故記曰鄉人士君子尊於房戶之閑也

鄉飲酒義曰庠門曰

房戶之閒皆謂鄉大夫之學爲庠制者也而其說未備遂大夫三歲大比明帥其吏而興毗注云舉民賢者能者如六鄉之爲然則亦必以禮禮賓之也五也六遂之縣正如州長則縣亦有序春秋亦必以禮會民而射於其序六也鄙師如黨正鄙亦當有序國索鬼神亦必以禮屬民飲酒正齒位七也王制命鄉簡不帥教者元日習射上功習鄉上齒以化之八也不變命右鄉移左左鄉移右如初習二禮以化之九也不變移之郊如初習二禮於郊學以化之十也不變移之遂又爲習二禮於遂學以化之十一也詩幽風朋酒斯饗曰殺羔羊躋彼公堂稱彼兕觥毛傳

曰饗者鄉飲酒也鄉人以狗大夫加以羔羊公堂學校
也觥所以示眾也鄭箋則云國君閒於政事而饗羣臣

於饗而正齒位故因時而誓焉毛鄭略有不同毛云在

學校鄭意在燕朝要云正齒位則亦是鄉飲酒十二也

按詩鄭箋正義以月令孟冬大飲烝釋之月令注天子
諸侯大飲於大學正齒位而箋則不云於大學但云饗
羣臣而正齒位則公堂謂燕朝也蓋注禮在前
箋詩在後立說有異不當牽合正義未是也

說文水

部泮下曰諸侯鄉射之宮夫泮宮諸侯之大學也而曰

鄉射之宮朱子詩集傳用之則諸侯於是行鄉射之禮必先行

鄉飲酒之禮矣十三也說文廩下曰天子饗飲辟廩

藝文

類聚作辟廩天子饗飲處也

依食部饗下曰鄉人飲酒也與毛傳合

然則此饗飲卽鄉飲也辟離天子之大學也而曰天子
饗飲處則天子行鄉飲酒禮於是矣十四也名爲鄉飲
酒而在鄉者六在郊者一在遂者四在燕朝者一在諸
侯之大學者一在天子之大學者一曾謂小學在四郊
者必禁其不許行鄉飲鄉射耶書闕有聞其他不見於
經傳者所貴好學淡思心知其意恐尙不止此也足下
謂小學必在西郊一處必非在四郊而王制注明云郊
學乃謂係鄉學之在郊者而非郊學以伸已說攷鄭注
明云郊鄉畊之外者也畊者竟也竟於此也鄉畊之外
猶云鄉境之邊也百里之內爲鄉百里之外爲遂其中

之限謂之郊王制曰虞庠在國之四郊必在百里竟上
鄉大夫之學必不在邊由鄉而移郊由郊而移遂始在
鄉兩爲習禮於鄉學繼移郊爲習禮於郊學終移遂爲
習禮於遂學學隨地改名以實殊若郊學仍是鄉學鄭
何不云又爲之習禮於鄉學之在郊者以別之乎且郊
學鄉學何分尊卑乃云愚以鄉學所得行者躋而習之
於小學乎豈可行於大學者顧不可行於小學乎且鄭
明云郊學而不之信若文王世子凡語於郊者鄭注亦
云語謂論說於郊學此二郊學何別而必文王世子爲
郊之小學王制爲鄉學乎蒙竊惑焉至云割截大戴禮

未嘗割截也劉芳崔靈恩皆本係傳篇而云大學在國
四小在郊至云掊擊非掊擊也凡吾輩之言皆以明理
明經而已何憾於古人而必欲辯之又何憾於今人而
必欲辯之哉惟足下教之玉裁白

再與顧千里書論學制備忘之記

千里足下周禮之制王城方九里謂之國城中謂之國

中匠人注云國中城內也司士注曰國中城中也載師以塿里任國中之地注云謂民之邑居在都城者大

宰注曰邦中在城郭者鄉大夫注曰國中城郭中也城外五十里爲近郊謂至五

夫注曰五十里乃爲近郊也杜子春云五十里爲近郊鄭注周禮尚書皆同

至百里爲遠郊鄭司農引司馬法曰

王國百里爲郊杜子春曰百里爲遠郊近郊遠郊見載師近郊經不多見

遠郊經文謂之郊謂之四郊大宰注云四郊去國百里郊之內爲六

鄉司徒序官鄭司農注如此謂距城百里以內爲六鄉至二百里爲野遂人注曰郊外曰野

野之內爲六遂遂人鄭司農注云遂謂王國百里外王制注云遠郊之外曰遂經文多

以國中四郊竝舉如大宰一曰邦中之賦二曰四郊之賦閭師掌國中及四郊人民六畜之

數小司徒稽國中及四郊都鄙之夫家九比之數

言四郊卽關六鄉在內但言

鄉則未見鄉之所際故言六鄉不可以關四郊也郊者鄉與遂之閒也

如今二縣相接畛碑國中四郊對舉猶今人云城

裏城外也鄭注王制移之郊云郊鄉畊之外者也正謂

郊在鄉與遂相接之閒故云鄉畊之外者謂鄉之邊也

四郊之學必在乎此經文未有謂城外爲國中者今足

下乃分國中爲鄉畊之內者郊爲鄉畊之外者皆有鄉

學州序黨序無論國中之名斷非所施於城外而云國

中與郊皆有鄉學州序黨序不將謂每鄉鄉學有二乎

若每鄉鄉學有二則是十二鄉也若止於一則必不應

在邊也

鄉竟距國中百里其中甚寬近郊五十里亦是鄉地

且以王制經文先在

本鄉習禮次左鄉移右右鄉移左次移郊次以鄉人而

移遂明自近移遠井井可稽注文郊鄉畊之外者也

稍出遠之後中年又爲之習禮於郊學此言鄉畊之邊

郊學在焉故稍出遠之令其居鄉之最遠處以示更將

遠徙之意若如正義云此郊謂近郊則是自遠移近而

非稍出遠之之謂王制注之郊學卽四郊之虞庠何不

可通而云大學小學爲一類鄉學遂學爲一類二類必

不相通鄉飲鄉射但可行於鄉遂不可行於小學乎若

欲分其類則鄉學一類也遂學一類也小學一類也大

學一類也先王以此四者教人豈必畫然不相通乎遂可以行鄉射鄉飲矣鄉可以移遂矣而鄉必不可移郊學乎命鄉論秀士升之司徒曰選士司徒論選士之秀者而升之學曰俊士此學大學也非鄉學大學相通之制乎而鄉學之人紺諸郊學何不可通乎小司徒之文曰六鄉四郊之吏鄉與郊必兼舉者示有別也王制注曰爲之習禮於郊學文王世子凡語於郊者注曰語謂論說於郊學此兩郊學何別乎鄭氏以虞庠說文王世子何不駁正之爲鄉學乎鄉飲鄉射之禮可行於州黨可行於遂可行於朝可行於大學古人皆言之矣而

獨虞庠禁其行乎抑前書所舉已十四事今又得行於大學者一事王制曰王太子王子羣后之太子卿大夫元士之適子入學以齒將出學小胥大胥小樂正簡不帥教者以告大樂正大樂正以告王王命三公九卿大夫元士皆入學不變王親視學注云亦謂使習禮以化之不變王又爲之親臨視重棄賢者子孫此習禮皆於大學也云皆者謂王命三公九卿大夫元士入學旣習禮以化之矣而猶不變王乃親臨又爲習禮以化之也此注習禮以化之與命第簡不帥教者注習禮以化之有異耶然則習禮正是習射習鄉非有他也而命三公

以下於大學習之王又親臨習之於大學茲非鄉射鄉飲可行於大學之確證乎孔氏正義以春夏學干戈秋冬學羽籥皆於東序春誦夏 弘大師詔之瞽宗禮在瞽宗書在上庠樂正崇四術證之顯非鄭意然足下又將以斥孔爲武斷矣蓋鄉學者民之學也大學者王太子以至元士之適子之學也民之學大司徒及鄉大夫主之王太子及公卿大夫士之子之學王及大司樂主之故其簡紳之制不同鄉學之民必升於司徒以升於大學曰造士而後大樂正以告於王而升諸司馬曰進士而四郊小學亦領於大司徒國子及民皆按年入焉其

閒國子則按年由小學入大學民則由大司徒升入大學記云凡語於郊者必取賢敏才焉或以德進或以事舉或以言揚是亦大樂正論造士之秀者升諸司馬曰進士猶六鄉之升司徒升學而升司馬也夫王及卿大夫行射鄉二禮於大學而足下乃謂必不可行於小學耶前書未省足下國中二字指城外故謂足下以城中爲鄉喻之內郊爲鄉喻之外今知足下意不如此是愚未諦也愚云喻外非鄉亦未的鄭實謂郊爲鄉之邊竟郊學則虞庠耳凡著書者各行其是而已惟足下覽之並惠小學備忘之記十本以公同好不宣玉裁白

三與顧千里書論學制備忘之記

千里足下成周學制中爲王宮之學師氏保氏領之次爲大學大司樂領之大司樂王制謂之大樂正以上國中之學也自國而爲六鄉鄉有鄉學其屬別爲州黨族比閭每鄉州五黨二十五族百有二十五閭五百比二千五百州有州序黨有黨序古者仕焉而已者歸教於閭里朝夕坐於門側之堂學記所謂家有塾也鄉大夫等掌之大司徒領之自鄉而四郊每郊有郊學王制虞庠在國之四郊鄭注周立小學於四郊鄉之不帥教者不變移之郊鄭注爲之習禮於郊學文王世子凡語於郊

者必取賢斂才焉鄭注謂論說於郊學祭義天子適四
學當入學而大子齒鄭注四學謂周有四郊之虞庠也
皆是也亦大司徒領之由郊而外距郊百里內爲六遂
鄉里鄧鄙縣皆其屬別也每遂有學學記所謂術有序
是也其所屬之學當亦如鄉遂大夫等主之亦大司徒
領之此城中城外學之大槩也六鄉之學在城郊相距
百里之中其地方四百里六鄉分布焉其立學之詳不
可知計鄉學必在百里適中之地州黨可環而赴焉鄉
大夫每鄉卿一人者可居其所而理焉如今日州縣之
廩署無有居於所治之邊者卽云州黨之序亦得稱鄉

學然州黨之學所容不廣況不帥教之始耆老皆朝於庠庠必鄉學非州黨得稱旣移之右鄉移之左鄉必皆鄉學也鄉學必在百里之適中而不在邊虞庠乃設百里之邊故記曰在國之四郊注謂之郊學命鄉簡不帥教者習禮先在本鄉繼右鄉移左鄉左鄉移右鄉繼移郊學繼移遂學終乃屏之遠方由近洎遠釐然可攷足下必不信戴記鄭注虞庠在四郊之明文謂王制注之郊學乃鄉學州序黨序之在四郊者名以實異果爲鄉學鄭何以目爲郊學乎然則小學在郊畢竟在何地乎且每鄉鄉學一而已矣不能有二也足下乃云百里內

爲六鄉者地爲四同并國中及郊共爲六鄉也國中爲
鄉畊之內者郊爲鄉畊之外者皆有鄉學州序黨序誠
然則是天子城內有鄉學州序黨序遠郊又有鄉學州
序黨序天子城內安得有鄉州黨乎毋乃名不正言不
順乎且國中有二鄉學遠郊又有六鄉學不知合之爲
八鄉乎抑城外祇四鄉而合國中右鄉左鄉乃爲六鄉
乎尋足下之說由過信孔穎達孔正義云遠郊之內六
鄉居之若鄉民近國城及國內之人其學在國中或在
公宮之右或在公宮之左故前云右鄉左鄉今注疏刊本奪此二字
若鄉人遠國城在近郊之外者則學在近郊其習禮

亦鄉大夫臨之如其說以右鄉左鄉爲國中之學右鄉
在王宮右左鄉在王宮左聞之殷制小學在宮左矣未
聞周有鄉學在王宮左右也且王城方九里耳左右互
移何足示儆也且國中何以得稱鄉也孔氏但云其學
在國中而已足下乃隱括之云孔氏言右鄉左鄉爲國
中之鄉學州序黨序確不可易毋乃更爲孔添瘢痏乎
愚謂孔誤讀國之右鄉國之左鄉二國字耳經言國非
言國中國中不得有鄉也不得有鄉學也國門而外百
里而內其適中之地爲鄉學國中及近郊以內之人學
焉遠郊以內之人學焉其南北道里均也六鄉之學分

布其東西道里亦必均也其在西者爲右鄉其在東者爲左鄉不帥教而不變者左右互徙以倣之言東西可以該南北南北鄉互移當亦如是世本有東鄉曠周禮注有南鄉甄東鄉爲人其得氏由此也右鄉移左者約百里不變則又移之東郊約五十里習禮東郊之學左鄉移右者約百里不變則又移之西郊約五十里習禮西郊之學又不變而移東郊者移之東遂之學移西郊者移之西遂之學遂學蓋在郊以外野以內適中之地相距亦約五十里虞庠在郊據王制移鄉移郊移遂之序而知之如足下說王制注郊學爲鄉學是鄉學在邊

不在中官民皆有不便且在邊鄉學之民一不帥教而習射習鄉再不帥教而右鄉之邊移左鄉之邊左鄉之邊移右鄉之邊是卽經文之移郊而三移者闕其一矣若或移入於國中之鄉學則又似秀士之升國中而非簡紳況國中斷無鄉學耶似進退皆無據矣凡尚賢以崇德由外以升諸內簡不肖以紳惡由內以移諸外王制之大例也大司徒鄭注六鄉地在遠郊之內則居四同先鄭云百里內爲六鄉皆謂王城地亦在四同之內非謂王城亦可稱鄉也謂自城外至百里皆爲六鄉之地非謂近郊外遠郊內乃爲鄉也唐孔氏不能憲然故

辭多滲漏而右鄉左鄉在城內尤爲繆戾合地官所言賦稅師徒田役校比之法觀之知城門而外百里而內統爲四郊尤不可云鄉學在遠郊也間之東原師曰鄭注有八九分正義只四五分故正義必分別觀之去其非以求其是淘其沙而金益見愚守其說不敢忘也足下卽以爲附會紐合卽以爲掊擊卽以爲武斷卽以爲誣古人愚皆不敢辭唯足下國中有鄉學之說再四尋繹而後得其說之所自是之媿耳未嘗學問且老眊多忘所有三札內不解之疑若鄉飲鄉射可躋於大學而不可行於小學國中何以有鄉學州序黨序文王世子

王制注同言郊學而不同解諸條惟望爲剖析使愚者
渙然爲幸尊著備忘記仍望見惠三十本玉裁白

周禮立文之例遠郊乃稱四郊近郊不得言四郊王
制虞庠在國四郊王肅以近郊釋之非矣又不變移
之郊正義云此郊謂近郊也近乃遠之譌字亦不可
因刊本字譌而誣之也併白

四與顧千里書論學制備忘之記

千里足下自訓詁之學不明而治經多惑卽舉郊字言之郊之爲言交也謂鄉與遂相交接之處也故說文曰距國百里爲郊此郊之本義也謂必至百里而後爲郊也而爾雅曰邑外謂之郊說文曰下本之亦曰邑外謂之郊邑者國也是則自國中而外至於百里統謂之郊矣此引伸之義也何以引伸也國外郊內爲六鄉之地故周禮立文多言國中及四郊以包六鄉其有單言六鄉者其事不涉國中者也言四郊可以包鄉故爾雅曰邑外謂之郊案誓三郊三遂卽三鄉三遂周禮又於百

里之中立近郊之名皆由是也既有近郊則不得不謂百里爲遠郊矣聘禮遂行舍於郊鄰國之近郊也及郊請反命主國之近郊也賓及郊則遠郊也賓至於近郊則顯言近郊也易之需于郊同人于郊皆謂百里之郊也王制鄉不帥教者不變移右鄉左鄉再不變移之郊再不變移之遂鄭注云郊鄉畊之外者也此因經立文郊在鄉與遂之間故云此郊乃在鄉畊之外者非他處鄉亦可以稱郊近郊亦可以稱郊之比舉其字之本義以別於引伸之義也以郊別於鄉謂雖鄉而郊也故下文云爲之習禮於郊學謂雖在鄉之邊而實郊學也非

鄉學也故自鄉學移郊學自郊學移遂學也足下乃云必無郊學以鄉學在邊者當之以仲尼四郊斷無虞庠之說又云并國中及郊共爲六鄉以國中爲鄉畊之內者與鄭注郊爲鄉畊之外者爲儼句援孔氏正義右鄉左鄉爲鄉學之在國中者爲左證以仲鄭注郊學必是鄉學之說足下之用心苦矣而不知謂郊爲鄉畊之外則可郊在鄉之邊也謂國中爲鄉畊之內則不可國中斷非鄉也是以非鄉爲鄉也雖有孔說斷不可通蓋國中而有鄉名則名不正國中而有右鄉左鄉及各州黨及兩鄉學及各州黨之學則地不容國中有二鄉學其

外又有六鄉則是八鄉而周禮不當云六鄉國中有鄉老一鄉大夫二與大司樂掌大學者紛然錯出則制不便且鄉學何以必置於國中及四郊竟上而中閒相距百里之寬不置一學使百里內之民奔走恐後則於事不可解且王制立文明白曉鬯曰命鄉節不帥教者固六鄉之不帥教者也次不變卽此不帥教者也何以上文爲六鄉之人而此右鄉左鄉又爲國中之人則文不順且右鄉左鄉爲國中之人下文移郊移遂皆卽此右鄉左鄉不帥教不變者是簡不肖以紕惡專爲國中鄉學而設而國外之六鄉不與焉則文更不順凡若此等

足下雖有百喙能爲孔沖遠置辯一言否而足下方引爲奧主以與鄉畊之外者爲對偶自矜獨得之秘足下倘謂百里中爲畊內郊爲畊外尙爲近是而鄭注母庸作此贅語以配之也將母訓詁之法有未明與鄭方見郊於鄉足下乃見鄉於郊鄭方恐人疑爲鄉學別之曰郊學足下乃惟恐人據爲郊學而易之曰鄉學謂鄉遂與大小學爲二類謂射鄉二禮必不可行於小學大學一類潛心三禮詳稽載籍參會羣言者固當如是耶始謂小學不在四郊猶倚孔氏之說也終乃云鄉在國中將古聖人體國經野正名百物之意謂何愚非好辯也

而好疑義相析故貢其說於左右以求析焉仍將尊製
見惠數十本爲望不悉玉裁白

五與顧千里書論學制備忘之記

千里足下大製謂小學大學爲一類鄉學遂學爲一類
鄉飲鄉射二禮乃鄉遂行之斷無躋行於虞庠小學者
愚以爲孰非天子之學者而乃云小學大學天子諸侯
主之鄉遂學鄉大夫遂大夫主之乎鄭不曰大司徒主
六鄉乎射鄉二禮可行於大學旣於王制及說文得其
三證自諸左右矣然則畫然二類不相通之說其然乎
其不然乎雖然以大學可行證可行小學足下所嘗爲
斷章取義也今又得一事焉虞庠行鄉飲酒於文王世
子可攷也凡語於郊者必取賢斂才焉曲藝皆誓之以

待又語三而一有焉乃進其等以其序謂之郊人遠之
於成均以及取爵於上尊也鄭注董仲舒曰五帝名大
學曰成均則虞庠近是也天子飲酒於虞庠則郊人亦
得酌於上尊以相旅按虞庠者周之小學也而鄭云天
子飲酒於虞庠非天子行鄉飲酒禮於虞庠乎郊人得
酌於上尊以相旅非虞庠在四郊之證乎五帝大學曰
成均而大司樂掌成均之法治建國之學政合國之子
弟文王世子之記語於郊者於成均取爵於上尊然則
大學小學皆得謂之成均也鄭明云天子飲酒於虞庠
矣而謂習射習鄉必無行於小學之理耶蒙矯惑焉王

制習射上功習鄉上齒以下注云習禮者七云習禮以化之者一皆謂習射習鄉也則又鄉學郊學遂學大學皆行二禮之證也愚於三禮本未究心今得潛心三禮者而請業焉幸甚幸甚惟足下教之大製速惠數十本爲感不悉玉裁白

六與顧千里論學制備忘之記

前者奉書第五通說郊字訓詁略舉周禮儀禮言之尙未及詩攷毛詩言郊者大雅言自郊徂宮此謂百里之竟也其立文自郊徂宮與周禮言國中及四郊同舉兩耑以括其中也顧鼠適彼樂郊傳曰郭外曰郊卽爾雅邑外曰郊與周禮闇胥徙於國中及郊謂國中之民出徒郊郊之民入徙國中者正同皆謂國外卽爲郊不主百里竟上也小雅出車曰我出我車於彼牧矣我出我車於彼郊矣傳曰出車就馬於牧地箋云牧地在遠郊然則詩之牧郊是一處主謂遠郊百里竟上卽周禮之

以牧田任遠郊之地也魯頌駟曰駟駟牧馬在坰之野傳曰坰遠野也邑外曰郊郊外曰野野外曰林林外曰坰箋云必牧於坰野者避民居與良田也引周禮牧田任遠郊證之是則牧田在野野在百里外駟言在野者出車則謂之郊野距遠郊不遠也故爾雅言邑外曰郊郊外曰牧牧外曰野詩毛傳周禮注言邑外曰郊郊外曰野較少四字而實無異析之則爲郊牧野林坰合之則牧野林坰皆得統謂之郊言郊可以關野而郊之本義非野也野本距城二百里之名引伸爲二百里以內距遠郊之名故云郊外曰野而甸鄙縣都去國三百里

三百里四百里五百里皆謂之野故遂人掌邦之野注
云此野謂甸鄙縣都其官爲遂而所掌不止於遂也牧
田在野得稱郊者自遠郊以至六遂之餘地皆有牧田
周禮舉近以包遠也燕燕遠送於野傳云郊外曰野謂
送至於遠郊而非必至遠郊外也干旄詩曰子子干旄
在浚之郊傳不以邑外曰郊釋之而以郊外曰野釋之
謂此郊不竟於遠郊而在遠郊外曷爲不竟遠郊也天
子公邑之田在甸地二百里以內也家邑之田在鄙地
三百里以內也家邑者大夫之采地小都卿之采地大
都公之采地王子弟所食之邑也皆不得在遠郊之內

以是推之諸侯卿大夫之食邑亦斷不在公侯遠郊五十里侯伯遠郊三十里子男遠郊十里之內毛云浚者衛邑臣有大功世其官邑故此郊不得以邑外曰郊釋之致嫌邑在郊內必以郊外曰野釋之明邑在郊外野而得稱郊者猶出車之牧得稱郊也碩人曰稅於農郊毛傳云農郊近郊也以別諸遠郊也何以謂之農郊也近郊者民居稠密之地六鄉之腹也是以謂之農郊也猶之聘禮及郊請反命注曰郊近郊也亦以別諸遠郊也公卿大夫之食邑亦有國有郊有野故衛干旄曰在浚之郊株林曰稅於株野浚株皆食邑也毛公之釋干

旄謂在浚之郊猶言在郊之浚鄭箋不以爲然故易之曰建此旄來至浚之郊是毛謂國郊鄭謂邑之郊以次章三章曰在浚之都在浚之城例之由郊而都城鄭爲長矣古聖人正名百物名有由一定而遷移者焉有遷移仍不改其一定者焉如距國二百里者野也百里以外二百里以內六遂之地亦野也二百里以外至於畿亦野也距國百里郊也百里以內六鄉之地皆郊也百里之外牧野皆郊也距國五十里近郊亦郊也故注家必分別以見其義若王制不變移之郊注曰郊鄉畊之外者也因上文言鄉下文言遂郊在其閒故別之曰鄉

畊之外者以見其爲鄉之邊百里之竟上四郊虞庠之所在也詰訓之法由古音可得古義而義之見於經同字異解者貴好學深思心知其意郊鄉畊之外者不得以國中鄉畊之內者爲之對偶謂皆有鄉學也惟足下復之玉裁白

七與顧千里書論學制備忘之記

孔沖遠正義釋王制國之右鄉國之左鄉爲在國中王宮之左右足下所謂確不可易者前書旣辯之如摧枯朽矣抑愚說右鄉左鄉卽鄉在國之西在國之東者亦未審記文何以不言西鄉東鄉而言右鄉左鄉也凡古云左右者皆取求甚近之詞亦東西不定之詞右不必定西左不必定東也郊四則可云東西南北鄉六則不云東西南北而云左右立一鄉於此其在左者爲左鄉其在右者則爲右鄉不帥教不變者或命移右鄉或命移左鄉皆就其切近之左右移之六鄉分布國中之外

四同之閒鄉學當在近郊五十里爲適中之處其距遠
郊之學約五十里其左右相距亦皆約五十里故移左
鄉移右鄉移郊道里相均以是度之六遂之學當在距
國百五十里之處移遠道里亦與移右鄉左鄉移郊相
埒鄉升俊士之秀者於國中大學亦相距五十里凡古
聖制度經無明文而可推測者往往如是惟惡於鑿盲
好學淡思心知其意者賢聖之所與而非賢聖之所禁
也愚前說右左卽西東自知非是故自更之凡以求其
是而已若乃未知秋駕而自謂已能御未知銜箭而自
謂已能射自護前非則愚有所不敢也惟足下正之仍

望將大作惠數十部爲禮不宣玉裁白

與黃紹武書

前者戴金谿比部讀四郊小學疏證因問孟子書何以或言庠序學校或但言庠序愚應之曰庠序校皆鄉學也學者小學大學也庠者養也校者教也序者射也然則學者學也孟子說庠序校皆以其同音之字義釋之古古相傳詁訓之法也鄭君注禮庠有堂有室序有堂無室以庠訓養而知其必有室以序訓射而知可無室此以詁訓推其宮室之制謂序之字同謝也小學大學之制必有堂有室所不待言也孟子說夏曰校殷曰序周曰庠學則三代共之漢書及說文解字則曰夏曰校

殷曰庠周曰序乖異由今攷之庠未嘗不射則庠可稱序也序未嘗不養老則序可稱庠也庠序校皆有學事焉皆有中年攷校之事焉則庠序校皆得稱學也漢志五比爲鄰五鄰爲里里有序序有右塾左塾何氏注公羊八十家爲閭有校室校室有塾然則公羊之校室卽學記之家有塾漢志之里有序也鄭人謂學爲校見於左氏春秋有鄉校則鄉庠可稱校之證也子衿刺學校廢學子佻達乘城而見闕是鄭國中大學亦稱校之證也夏曰校者今無徵而記曰夏后氏養國老於東序養庶老於西序又曰序夏后氏之序也是則謂夏曰序

可記曰殷人養國老於右學養庶老於左學又曰瞽宗
殷學也又曰小學在公宮南之左大學在郊是則謂殷
曰學可周人養庶老於四郊之虞庠又書在上庠又鄉
大夫有庠門是小學大學鄉學皆謂之庠矣學干戈羽
籥於東序又養老幼於東序又大司成論說在東序又
漢志云里有序是謂周曰序也可蓋庠序學校本無定
稱庠序校皆學也四者互相稱可也孟子滕文篇曰庠
序學校梁惠篇兩言庠序一詳一省意無二也舉庠序
以晐學校也言庠序學校皆所以明人倫言庠序之教
必申之以孝弟之義何以明人倫何以申孝弟曰鄉飲

酒鄉射而已矣鄉射必先行鄉飲鄉飲所以養老所以敬長也所以尊賢也惟鄉遂之賓興鄉大夫士飲國中賢者主尊賢其他行諸鄉焉行諸州黨焉行諸遂焉行諸鄉之公堂焉行諸郊學虞庠焉行諸大學焉行諸三公九卿大夫元士入大學焉行諸天子親視大學焉行諸天子親適虞庠焉行諸諸侯泮宮焉行諸天子辟廟焉皆主養老敬長而尊賢之意在其間禮綦重矣鄭君注黨正曰正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者爲民三時務農將闕於禮至此農隙

而教之尊長養老見孝弟之道也黨正飲酒禮以事屬於鄉飲酒之義微少失矣少失今本作失少誤微有誤少失者謂作戴記者少也

鄭意謂鄉飲酒義大半謂尊賢之事而以尊長養

老屬入之禮本不同故爲少失愚則謂鄉遂賓與三賓

尊賢之事也而鄉人諸父老來觀禮乃有坐立三四五

六豆之分以尊之養之鄉大夫賓與非不兼尊長養老

之事不得謂鄉大夫與黨正之禮有二黨正飲酒於序

其制大約年最長者爲大賓次長者爲介又次爲席賓

其中略以貴貴參之而不主尊賢故有尚齒不尚賢者

斷無有尚賢不兼尚齒者凡行諸虞庠行諸公堂行諸

大學行諸辟廡泮宮皆主尊長養老而天子食三老五
更執醬而饋執爵而酳冕而總干尊長養老之至也卽
尊賢之至也人未有能尊長養老尊賢而內遺其親外
後其君者故周禮一則曰以陽禮教讓一則曰以賓射
之禮親故舊朋友一則曰五州爲鄉使之相賓詳其儀
於禮經十七篇詳其習禮之用於周禮戴記詳其說於
鄉飲酒義凡欲以陶鎔子弟桀傲不馴之氣使和柔服
習於鄉飲鄉射之中孟子曰明人倫者此也申之以孝
弟之義者此也古聖人制爲鄉飲酒禮布於邦國都鄙
矣其事易行其典最重鄉大夫之文曰以禮禮賓之不

言以鄉飲酒禮言以禮者謂其爲家喻戶曉之禮也其下乃言以鄉射禮者別諸上文之以禮也漢人最重鄉飲酒禮而天子食三老五更致虞以後帝王亦尙有行鄉飲酒於太學者今

國家之制亦令州縣舉行是古禮無日不在天地間今說經者乃曰周之學制小學大學爲一類鄉學遂學爲一類鄉飲鄉射行於鄉遂而已斷無躋行小學大學者然則文王世子注不云天子飲酒於虞庠乎虞庠非小學乎王制注不云習射鄉二禮於大學以化王子國子不帥教者乎許氏說文解字不云天子鄉飲於辟廡諸

侯鄉射於泮宮乎改王制注之郊學爲鄉學以伸四郊無虞庠之說遂抑爲鄉遂學與小學大學格格不相通之說然則鄉遂之民宜尊長敬老尊賢而小學大學中人皆不必尊長敬老尊賢也孟子所云人倫孝弟者在鄉而不在小學大學也古聖人有闢睢麟止之意而後行周官之法度今之學者必其中油然生孝弟之心而後可學詩禮鄉飲酒義曰民知尊長養老而後乃能孝弟民入孝弟出尊長養老而後成教成教而後國可安也橫渠張子曰今世學不講男女從幼便驕惰壞了到長益凶狠只爲未嘗爲子弟之事則於其親已有物我

不肯屈下爲子弟則不能安子弟接朋友則不能下朋友有官長則不能下官長爲宰相則不能下天下之賢甚則至於徇私意義理都喪也只爲病根不去隨所居所接而長至哉言乎倘鄉飲酒禮常習安至於此哉愚因孟子之言攷三禮之義而淡味乎十七篇情不得指讓進退於其間也吾兄之學非勝口說而好求其實敢以是請正焉玉裁白

附顧千里第三札

茂堂大令閣下旬日中作書四通數千餘言得無勞乎側聞閣下以僕不荅爲罪夫去冬荅閣下之兩書閣下旣以爲罪矣今又云然然則進退罪也爲閣下之朋友亦難矣哉閣下責僕以荅者果急欲聞僕解閣下所不解者乎則僕固不敢不荅也閣下不解者其一曰鄉飲鄉射可躋於大學而何不可行於小學異哉斯言也鄉飲鄉射又可躋於大學乎哉三禮中
有之否羣經中有之否夫天子國君大學但有饗又有大飲酒之饗小學亦有饗又謂之飲酒有何鄉飲

酒哉不過其禮之篇已凸而鄉飲酒亦可名饗故閭
下因思以鄉飲酒冒之耳其實明文散見各經各注
者不可冒也月令孟冬是月也大飲烝鄭注十月農
功畢天子諸侯與其羣臣飲酒於大學以正齒位謂
之大飲別之於燕其禮凸今天子以燕禮郡國以鄉
飲酒禮代之明白如此尙可冒耶言於大學言其禮
凸與儀禮第四篇之毫無干涉亦易知矣詩幽風七
月朋酒斯饗鄭箋云十月民事男女俱畢無飢寒之
憂國君閒於政事而饗羣臣下云於饗而正齒位故
因時而嘗焉飲酒旣樂欲大壽無竟是謂幽頌所以

改毛與孟冬月令注末引此章而曰是頌大飲之詩
自同其說此饗之爲大飲酒明白如此尙可冒耶周
禮酒正曰凡爲公酒亦如之鄭注云謂鄉射飲酒以
公事作酒者亦以式法及酒材授之使自釀之是鄉
飲酒之酒鄉自釀也酒正曰以式法授酒材鄭司農
云授酒人以其材又曰饗耆老孤子皆共其酒是此
饗之酒酒人釀之也尙不足以知此饗之又不可冒
以鄉飲酒乎周禮外饗曰邦饗耆老孤子則掌其割
亨之事鄭注引王制曰周人養國老於東膠養庶老
於虞庠此與酒正饗耆老孤子聯事也東膠大學也

虞庠小學也文王世子曰於成均鄭注天子飲酒於虞庠所謂養庶老者也皆外饗掌割亨酒正共酒人掌爲之酒而豈鄉飲酒哉然則固無一可冒也閣下乃別援說文廟下天子饗飲辟廟泮下諸侯鄉射之宮以創造大學有鄉飲之說不思夫徐本泮下作鄉乃譌字楚金本韻會舉要不譌者自此兩饗字一爲爲天子大學之學一爲諸侯大學之饗未見其可冒爲鄉人鄉學之饗也閣下乃又援饗下以指作佐證而於是閣下之說巧矣雖然饗下所云鄉人飲酒从食从鄉鄉亦聲者許解饗字从鄉故取鄉人飲酒之名鄉者也與廟下泮

下兩饗各爲一義不容移之以創造其說僕之斯言
也閣下必大不服然而無庸不服也說文之通例也
假如開卷示部襯下以事類祭天神而史部事下職
也犬部類下種類相似唯犬爲甚不容移之而創造
襯者以職種類相似唯犬爲甚祭天神之說也祖下
始廟也而女部始下女之初也不容移之而創造祖
者女之初廟也之說也裸下灌祭也而水部灌下水
出盧江雩婁北入淮不容移之而創造裸者水出盧
江雩婁北入淮祭也之說也餘以類推豈待覩縷原
其故特以字之爲用竝非一義在本字下必說本字

所从之義至他字下用之唯其義之所當而已非不用本字下之義亦非必用本字下之義而盡廢一切之義使天下一字祇容一義其用之也亦必不供矣例之出於自然豈難知者況閣下之以說文之學名其家者乎得非故作違心之論以相給耶閣下又援毛幽詩傳以指作佐證閣下於是而更巧矣雖然毛以爲此鄉飲酒之在鄉學者則閣下所當知也至鄭改之以爲此大飲酒之在大學者則又閣下所當知也而閣下能割截毛之半鄭之半湊合成一事使鄉飲酒在大學乎吾知必不能也閣下縱能之毛鄭必

不受閻下如此武斷也閻下創造之說不過曰毛傳饗者鄉人以狗說文饗鄉人飲酒而大學小學有饗卽有鄉飲酒審如是也必饗之爲字祇容鄉飲酒一義而後可不思羣經饗字至多饗字之義又至多豈獨天子諸侯大學之饗小學之饗不得冒以鄉人鄉學之饗哉外此若羣經天子有幾饗諸侯有幾饗大夫又有幾饗其條分縷析具見閻下所并貶之義疏者不能重陳但一槩冒之爲鄉飲酒可乎不可亦閻下所當知也唯饗之不專一義故月令注幽詩箋爲十月大飲酒之饗外饗酒正經文王世子注爲春秋

養國老庶老之饗唯饗之不專一義故許叔重雖下爲天子大學之饗泮下爲諸侯大學之饗饗下爲鄉人飲酒唯饗之不專一義故毛言饗者鄉人以狗大夫加以羔羊僕以爲毛必不謂饗字祇容此義僕之斯言也閣下必又大不服然而無庸不服也假如形弓一朝饗之毛必不謂卽七月之饗可知果祇容一義是毛以爲天子錫有功諸侯亦行鄉飲酒耶而毛豈至是哉且果祇容一義鄭七月之箋又安所得大飲酒在大學以改毛鄉飲酒在鄉學者哉其無一可冒至於如此而閣下亦可以已矣若夫天子諸侯大

學但有大射有何鄉射哉儀禮鄉射在第五篇大射
在第七篇完好無恙以及羣經以及三禮鄭注莫不
昭如白日當天閣下亦自知其決難相冒無可柰何
之極思唯影借說文泮下有一射字旁見而側出之
僕代閣下窘矣南閣祭酒成說文以來未有影借用
之者也然彼之爲泮宮大射之射自若與鄉射毫無
干涉而影借何益噫閣下至冒鄉射於大射之時雖
欲創造其說而亦有所不能猶未可以已乎前閣下
立意貶僕自忘其躋鄉射鄉飲於小學今乃因僕拈
出思并躋於大學以揜其失而有何不解哉閣下不

解者又其一曰國中何以有鄉學州序黨序閭下不知國中四郊通爲六鄉乎請爲閭下略誦周禮可乎地官曰鄉大夫之職各掌其鄉之政教禁令下云辨其可任者國中自七尺以及六十下云其舍者國中貴者賢者能者服公事者老者疾者皆舍鄭注云國中城郭中也閭下創造城中無鄉之說何以處此經此注也又曰閭師掌國中及四郊之人民六畜之數鄭注云國中及四郊是所主數六鄉之中自廛里至遠郊也而載師云以廛里任國中之地閭下又何以處之比長云徙於國中及郊鄭注或國中之民出徙

郊或郊民入徙國中閭下又何以處之雖然閭下善
創造其說僕何能預料若就經言經則大司徒以鄉
三物教萬民誠國中非鄉豈國中非鄉三物所教耶
以鄉八刑糾萬民誠國中非鄉豈國中非鄉八刑所
糾耶儀禮禮記有鄉大夫鄉先生誠國中非鄉豈全
居城外耶不許或居城內耶或許之而別有名目也
不許徙居城內耶抑一徙而卽改名目也尚不足以
知國中有鄉也乎國中有鄉者非謂城內獨自爲幾
鄉也謂通城內城外以成六鄉也地之形實不平方
如圖古今一也故任地者必截長補短通國中及四

郊共爲六鄉七萬五千家除凡官所有宮室吏所治者謂之國宅不入於此其曰鄉曰州曰黨曰族曰閭曰比者特如後世之編幾都幾圖而非所以別城內城外若夫某鄉之有某州某黨某族某閭某比在城內之與在城外視其或寬或狹之地形而已由鄭氏所言或則鄉之所居州黨觀之則鄉雖萬二千五百家而鄉之所居必坐落一州非但坐落一州必坐落一黨可知或鄉之所居州黨在城內而餘州餘黨在城外或鄉之所居州黨在城外而餘州餘黨在城外亦視其或寬或狹之地形而已城中旣有鄉有州有

黨安能無鄉學州序黨序哉而閣下創造城中無鄉之說而以之貶僕繼知孔沖遠亦云然因并貶孔不思國中之鄉見於鄉大夫閭師載師比長矣大司徒鄉字義兼國中矣儀禮禮記鄉字義兼國中矣經文注文遽數之不能終其物而閣下獨貶僕而貶孔何哉孔沖遠唐之大儒也因貶僕而貶之不可又託爲戴東原之言貶其學至四五分尤大不可僕未遑熟看東原之書唯恐此言乃臨終枕牕獨授閣下者而僕何敢與聞但今舉以奉告皆經之正文注之明說不在五分四分之內閣下倘必欲相貶必謂之名不

正必謂之正名百物謂何請閣下其問諸經其問諸注幸少寬孔沖遠而已唯貶僕則所不敢辭也然使必如閣下之言而後名正而後正名百物則城中不得有鄉不得有州不得有黨自不得有族有閭有比矣夫比五家也以一城之內五家之比亦不得有豈蕩蕩空無居人耶又豈城內之居人不在比閭族黨州鄉之列別有名色不領於大司徒不關於萬民不見於周禮也乎創造之說亦太怪誕矣閣下不過恃猶今人云城裏城外一語作主思動今人之聽然而今人祇有城裏城外之云竝無閭下城裏無鄉之云

如今人終身住城裏自書名帖有曰鄉愚弟者矣未見有書城愚弟者也而閣下何居如今人積世住城裏其中進士而家居者稱之曰鄉紳未見有稱城紳者也而閣下何居今人讀書乎何不讀僕舉出之諸經注今人不讀書乎請讀閣下城裏城外四字再讀僕鄉愚弟鄉紳五字俟其熟而深思之徐再告以今人所云鄉貫鄉鄰一切等類可也且閣下每說創造而不虞造成之後便自相矛盾第二說城中無鄉第一說大學中有鄉飲鄉射通兩說而言之天子大學在城中者也豈城中非鄉之內孤懸一大學是鄉耶

不然何爲行鄉飲鄉射也將大學非鄉而閭下許行
鄉飲鄉射於非鄉之城中焉且許行鄉飲鄉射於非
鄉之城中大學焉獨自恕其名不正耶矛盾如此而
可弗知乎夫大學所謂國宅也不論天子在國中諸
侯在西郊皆非鄉也閭下必強其飲酒其射而鄉之
以非鄉爲鄉其斯之謂也城中之比閭族黨州是城
中之鄉也閭下必不肯鄉之以鄉爲非鄉尤未之前
聞閭下勿因僕拈出更創造他說多方文飾致益形
其支離詰屈於無窮也閭下不解者又其一曰鄭注
文王世子王制兩言郊學何以必不同實夫鄭注之

爲鄭注將上下貫通爲義耶抑盡斷上下而單以字面爲義耶王制注上文有郊鄉界之外者也一氣貫下而文王世子注不然何能附會紐合之使同實乎然則文王世子注天子飲酒於虞庠閣下能將通部禮記注內有飲酒字面者一一附會紐合之使同實乎況字面同而不同實注之通例亦經之通例也假如鄉大夫每鄉卿一人遂以摯見於鄉大夫鄉先生兩言鄉大夫而不同實儀禮十七篇中言主人者凡幾字面未有不同者而有同實有不同實至昏禮一篇中言主人者凡幾有主人爲女父者有主人爲婿

者有主人爲壻父者字面同而不同實如此亦可謂易解矣倘盡曰何以必不同實則經注觸處皆無可解而豈止兩言郊學者哉夫同名異實異名同實二者治經之大端也粗涉者所能知也廢其一則窒碍而不能通讀天下之書何莫不然閣下徒以貶僕之故取經之饗爲同名異實者并其實而同之取注之郊學爲同名異實者并其實而又同之不已廢其一也乎無乃不可乎豈閣下貶僕至於禁其粗涉而以此相給乎又豈閣下竟謂舉世無一人粗涉而唯閣下所欲爲乎閣下之不解如是而已若稍緩貶人

當皆自解無須僕之答也若必貶人而加之以不解二字恐終非告閣下以經以注之所能解也然而僕不敢不荅者閣下以爲罪故也至於四通中有閣下代學制備忘之記作解以貶孔貶僕而其實並非孔之解僕之解者不復詳荅兼有一言奉告自今以後願閣下於僕一切之說仍日日移書相貶倘貶之而當也僕必立刻作荅以謝閣下之賜教而志吾過貶之而皆若前三不解者耶僕唯有不荅而已僕生平是日是非曰非恐所荅有不如閣下意又將以爲罪何妨置之耶幸勿仍以不荅爲罪而責其必荅承索

拙記昨聊刻以省同人轉寫之苦非便欲遍送故竟
不再奉到違晤匆匆歲月如駛諸唯自愛不宣廣坼
啓三月初七日

如將見與四通書刻作大集望附錄此答而批其
閣下所仍必不解可也但勿添改刪潤以失僕本
來僕不曾有集又寒士無力多削劂故敢卽相煩
併啓

與黃紹武書論千里第三札

紹武二兄足下前者千里答書足下旣見其辭矣古云見善從之聞義則服非所望於彼故敢以白於足下俟其讀書有進再示之可也云愚以他饗冒鄉飲酒夫以說文求之鄉人飲酒者饗字之本義也故其字從鄉食會意邪風朋酒斯饗毛傳曰兩尊曰朋饗鄉人飲酒也據正義有此五字鄉人以狗大夫加以羔羊公堂學校也此用饗之本義也說文一書本篆下主說字之本義他篆下義必相同如愁下必云憇也眾下必云飾也立下必云佞性也與憇愁也飾眾也佞性也爲轉注今雖經淺人竄

改皆可攷之反其正其他篆下或用本篆引伸之義者

皆有條理可尋少有截然異義假借而用互注者故饗

下天子饗飲辟廡泮下諸侯饗射之宮

大徐作鄉射作
鄉射是言射以

眩飲作饗射

是謂鄉飲鄉

皆用其本義字非用他義引

伸假借字也說文之定例全書可稽也饗字見六經者

有祭祀之饗饗帝饗親是也其字應作肅故春享秋享

追享朝享周禮作享有賓客饗食燕之饗其字左傳多

作享有鬼神歆饗之饗如毛詩上言我將我享下言既

右饗之上言享以駢犧下言是饗是宜以饗从食而借

用也有飲之食之之饗如禮記春饗孤子秋食耆老亦

云仲秋養衰者孟冬養死事恤孤寡周禮謂之饗耆老
孤子曰饗曰養曰食一而已亦以饗从食而借用也凡
此等饗字皆與說文饗下饗下泮下之饗無涉一書自
有一書之例何可廣爲牽合以誣許君之所謂饗乎若
夫大學之行射鄉二禮以化王子國子之不帥教者王
制注詳之矣文王世子注曰天子飲酒於虞庠郊人得
酌堂上之尊以相旅非鄉飲酒而有旅酬乎彼雖多其
辭未可以誣經誣鄭誣許也說文饗下之饗飲卽鄉飲
也泮下之饗射卽鄉飲鄉射也饗射猶禮記之射鄉也
彼又云通城內城外爲六鄉授鄉大夫職國中自七尺

以及六十國中貴者賢者能者服公事者老者疾者兩
言國中皆鄉大夫所掌爲證此又不好學淡思心知其
意之過也彼誠體味全經之例可得其故矣以遂人遂
大夫例之事之最切近者也遂人掌邦之野注云郊外
曰野此野謂甸郁縣都夫甸郁縣都者公邑家邑小都
大都也鄭君云公邑謂六遂餘地天子使大夫治之自
此以外皆然二百里三百里其大夫如州長二百里謂
謂都如州長者中大夫也四百里五百里其大夫如縣正四百里謂
謂都如縣正者下大夫也是以或謂一百里爲州四百里爲縣云據
此是甸郁縣都固有分治之大夫而遂人遂大夫特兼

理之遂者二百里以內之正名故鄭注謂公邑爲六遂之餘地遂人職以六遂役分舉遂人遂大夫之本職在是而其聯事乃統二百

里以外至五百里諸大夫所治正如鄉大夫本職在六

鄉而其聯事辨可任者可舍者乃兼國中一則以內兼

外一則以外兼內一則以少兼多謂自二百里至五百里一則以

多兼少謂國方九里而已非甸鄙縣都皆可名遂國中可名鄉

也彼所舉閭師載師比長國中之文皆可通其故矣縣

師掌邦國都鄙甸郊里之地域鄭云自邦國以及四

郊之內是所主數周天下也豈天下諸侯邦國皆縣師

所掌之地乎且鄉老鄉大夫三公六卿也與王共治天

下者而不可理及國中乎至於鄉三物鄉八刑鄉大夫
鄉先生等號彼以爲國中有鄉之證古鄉字之本義訓
國之離邑民所封鄉也劉成國亦曰鄉者向也民所向
也其字从距自聲从距者言其居之相鄰也周禮令一
鄉中相保以至於相賓孟子言死徙無出鄉相友相助
相扶持親睦名曰鄉者取其相親禮莫重於民之相親
故鄉飲鄉射原非專爲六鄉制此禮也而必冠之以鄉
字鄉大夫鄉先生者謂民所親近亦也遂縣鄙鄼里鄰甸
鄙縣都及國中皆必稱鄉三物鄉八刑鄉飲酒禮鄉射
禮而地非鄉也鄉三物鄉八刑謂用之於相親之民者

也今之曰鄉貫曰鄉紳猶行古之道也而彼悉取爲國
中有鄉之證非俗所謂癡人說夢與國中方九里於郊
內四同計之不及四十之一豈國外尙不容六鄉而方
九里中宗廟社稷王宮官府倉廩庫藏前朝後市大學
城垣塗巷溝瀆充塞幾無餘者民居蓋亦屢矣王制所
謂三分去一者言天下之大率耳王國則當以三分去
二計之今以每夫二畝半爲率九里爲九九八十一井
可容二萬九千六百家三分去二可容九千八百七十
家三分去一可容一萬九千七百四十家核之周禮公
卿大夫士而外府史胥徒萬四千餘人皆不耕而以祿

代耕去其執事不居國中者不計其居國中執事者已在萬家以外況尙有居國中之公卿大夫士爲數二千外其居不可以每人二畝半限之者乎故曰國中之民居絕少也又況民所居者廛里二畝半冬入保焉春則出居廬井二畝半是國中之民未嘗非國外之民必於國中王宮左右立有左鄉右鄉孔沖遠之說固斷不可通至於彼謂文王世子注之郊學爲周之虞庠小學王制注之郊學乃是六鄉之學引他事同名異實者以證之辨則辨矣不知有識者笑其遁辭也夫論經者貴合經義何取乎遁辭文過故樂推明其理爲足下言之以

轉使好學者傳之惟足下鑒之不宣

荅黃紹武書

紹武二兄足下昨以與顧千里論學制備忘之記書五
篇呈政書中無一豪意氣也援經攷古以所疑質於潛
心三禮者而已學如足下乃云先生與千里以說禮起
爭端某學問粗疏未敢偏袒左右抑何謙耶抑畏佐門
之傷耶夫愚謹守先王之道豈血氣旣衰而尙虞有門
志耶且足下云先生年高學邃久已當代欽仰千里以
後起之雋與先生抗衡同輩實所竊議謂愚爲年高誠
七十有四矣謂愚學邃則愚何敢當少年衣食奔走旣
乃抗塵下吏晚乃補過讀書尙未知學安得言邃以一

生師友言之迥徹天下人性命愚不如先師東遼氏攷
工記喪服經制度條例攷覈精當上駕康成愚不如易
田徵君熟精史事識小無遺愚不如辛楣少詹潛心三
禮愚不如端臨學博耄而虛懷愚好學不倦愚不如召
弓學士涵齋侍講淡曉音均十七部袖繹成書愚不如
懷祖觀察文辭古雅愚不如姬傳刑部惟於古音古訓
經文古本略有微勞抑末也足下謂千里不宜與愚年
高抗衡耶抑謂不宜與愚學遠抗衡耶謂不宜與年高抗衡
則敬長之學固非所望於千里彼方謂周公所制之鄉
飲酒禮斷不行小學大學中尊長養老非聖人所重不

當以此責千里也謂不宜與學遠抗衡耶愚之學絕未
遠千里或遠於我則雖昔年師資於愚請業於愚一旦
學還過於愚愚必北面而事之願執經爲弟子苟卿子
曰青出_於藍而取之藍昔人始抗顏爲師轉而北面者固
有其人又不當責以抗衡也愚謂足下所云同輩竊議
者皆不足以服千里之心也雖然愚爲四郊小學疏證
以正於千里千里經兩月之久爲學制備忘之記駁之
其立說之大凡曰鄉遂學與小學大學爲二類絕不相
通鄉飲鄉射可行於鄉遂斷不可行於小學大學王制
注中郊學非文王世子注之虞庠郊學乃鄉學百鄉學

王城中及遠郊境上中間百里之寬絕無鄉學以愚與彼五札攷之鄉飲鄉射行於小學大學者經有明文國中決無鄉學千里自謂潛心三禮自必所據博精蓄而未發故不憚四五請正而一字未復豈其研都必一紀練京必十年耶苟其確鑿指示令愚者渙然冰釋怡然理順愚方愧之不暇謝之不暇北面執經爲弟子之不暇又何有於居之不疑囂囂然與老革抗衡哉若是是竊議者不足以服千里之心而千里轉可以服竊議者之心關其口而斂之氣而足下乃亦可決劉呂之雄雌曉然袒左袒右之宜而無所疑矣昔東原師堅拒愚稱

弟子而愚必弟子焉古音十七部之說成於乾隆丁亥至己丑以質師師不之信至嘉庚寅官黔後乃以書然之曰是可以千古矣蓋義理一時未通者雖吾師之通明且有之惟不以憲氣自用故學可以淡遠謂極矣苟無志於學用爲爭名之具是尙未能淺又安能邃愚雖陋不至此也足下乃謂年高手硬心意闇澹之老人與腦滿腸肥初學執筆者斷斷相爭乎哉俗事出門十數日俟歸而面言所有拙著不必遽還可與同輩觀之評之徐心田許周生戴金谿江鐵君李四香臧在東皆學者也不宣玉裁白

與諸同志書論校書之難

校書之難非照本改字不謬不漏之難也定其是非之難是非有二曰底本之是非曰立說之是非必先定其底本之是非而後可斷其立說之是非二者不分轢轢如治絲而棼如算之淆其法實而瞀亂乃至不可理何謂底本箸書者之稿本是也何謂立說箸書者所言之義理是也周禮輪人望而視其輪欲其慎爾而下廸也自唐石經以下各本皆作下廸唐賈氏作不廸故疏曰不廸者謂輻上至轂兩兩相當正直不旁廸故曰不廸也文理甚明今各本疏文皆作下廸下廸者謂輻上至轂兩兩相當正直

不旁通故
云下通也

其語絕無文理則非賈氏之底本矣此由宋人以疏合經注者改疏之不字合經之下字所仍之經非賈氏之經本也然則經本有二下者是與不者是與曰下者是也望而視其輪謂視其已成輪之牙輪圓甚牙皆向下通邪非謂輻與轂正直兩兩相當經下文縣之以視其輻之直自謂輻規之以視其圓自謂牙輪之圓在牙上文轂輻牙爲三材此言輪輻轂輪卽牙也然則唐石經及各本經作下是賈氏本作不非也而義理之是非定矣倘有淺人校疏文下通之誤改爲不通因以疏文之不通改經文之下通則賈疏之底本得矣而

於義理乃大乖也王制虞庠在國之四郊注云周立小學於四郊唐孔氏本經注皆作西郊疏云西序在西郊周立小學於西郊

祭義天子設四學當入學而大子齒注云四學謂周有四郊之虞庠孔氏本改注作西郊故疏云天子設四代之學周學殷學夏學虞學也天子設四學以有虞庠爲小學設置於西郊當入學之時而大子齒於國人今本疏文作設置於四郊文理不可通則非孔氏之底本矣此由宋人以疏合經注者改疏之西郊合注之四郊所仍之注非孔氏之注本也然則祭義注本有二四郊是與西郊是與曰四郊是也鄭注以周有四郊虞庠釋經

四學文理一直竝無轉折周有四郊虞庠卽王制之虞庠在國四郊注之周立小學於四郊也故皇侃云四郊皆有虞庠通典云周制大學爲東膠小學爲虞庠引鄭注祭義周有四郊之虞庠又引崔靈恩說亦云鄭注祭義曰周有四郊之虞庠北史劉芳傳芳表曰禮記云周人養庶老於虞庠虞庠在國之四郊又云天子設四學當入學而大子齒注云四學謂周四郊之虞庠也劉崔皇杜所見祭義注皆作四郊王肅雖好駁鄭而劉芳表云王肅禮記注云天子四郊有學去都五十里鄭氏則不知遠近按鄭注王制移之郊云爲習禮於郊學郊在

鄉界之外則鄭謂郊學在遠郊百里肅則云近郊五十
里惟此爲小異而小學在四郊無異故盧辨注大戴禮
亦言四郊之學劉芳表曰大學在國四小學在郊引保
傳篇帝入東學帝入西學帝入南學帝入北學帝入大
學而總之曰周之五學於此彌彰崔靈恩亦曰凡立學
之法有四郊及國中四郊竝方名之國中謂之大學然
則四郊小學絕無可疑再證以王制注習禮於郊學在
六鄉之外六遂之內則斷不專在西郊一處亦可證或
以祭義祀先賢於西學爲疑不知此卽保傳篇帝入西
學尙賢而貴德祭先賢專在西郊也西學者四郊之一

別辭也四學者合四郊言之都辭也孔氏於王制依誤本西郊虞庠因改此注亦作西郊之虞庠而經文故作四學因用儀禮注周立四代之學釋經之設四學以四學中有西郊虞庠釋注謂周西郊之虞庠是不思儀禮四代之學謂立大學於國中不得與郊之小學糅合爲四也且以一承四甚費周折是孔氏二疏作西郊皆非也而義理之是非定矣倘有淺人校祭義疏改四爲西因竝改祭義注之四爲西王制經注疏之西郊皆沿誤不改則孔疏之底本雖得而於義理乃大乖也春秋左傳衛侯賜北宮喜謚曰貞子賜析朱鉅謚曰成子而以

齊氏之墓與之杜注曰皆死而賜謚及墓田傳終言之
宋本亦或作皆未死而賜謚及墓田傳終而言之二者
皆出於宋本孰爲是與曰皆死而賜者是也二人時未
死也既死而賜故要其終而言之若云皆未死而賜則
傳終言之句不可接而爲贅辭矣是一本作未死而賜
者非也然則死而賜於說經是與曰春秋常事不書書
者爲其未死而賜也云死而賜則杜注之底本得矣而
於義理有合也毛詩涇以渭濁箋云涇水以有渭故見謂
濁正義曰涇水言以有渭故人見謂已濁猶婦人言以

有新婚故君子見謂已惡也引定本箋作涇水以有渭故見其濁釋文曰故見渭濁舊本如此一本渭作謂後人改耳按同一字而正義作見謂師古定本作見其釋文作見渭三者孰是曰正義作謂是也如釋文作見渭則不可通定本作見其亦因舊作渭不可通而改之耳作見謂濁文理易憭陸德明反說見謂爲非見渭爲是苟知孔氏疏文底本作見謂不誤而義理之是非亦定矣倘有必據釋文以改正義則孔疏之底本失而於義理乃大乖也士冠禮以摯見於鄉大夫鄉先生冠義同上鄉字釋文作鄉云二鄉竝音香二經疏皆作卿大夫

鄉先生賈云經言卿大夫不言士孔云謂在朝之卿大夫也卿卿果孰是與曰鄉大夫是也作卿非也凡言鄉大夫有一義一則周禮之本鄉鄉老鄉大夫關以下州長黨正族師閭胥也鄉大夫卿也鄉老公也舉鄉大夫以上關公下關士也一則本鄉之仕爲大夫在朝者亦舉大夫以關卿士也鄉射禮注云遵者鄉之人仕至大夫者又曰鄉先生鄉大夫致仕者也此鄉大夫三字所謂同一鄉之人仕至大夫者同一鄉而仕至大夫曰鄉大夫每鄉卿一人者亦卽大夫之一也同一鄉仕至大夫致仕者曰鄉先生卽上老坐於右塾庶老坐於左塾

鄉飲鄉射則謂之遵者是也鄭於禮記皆釋鄉先生不釋鄉大夫者禮記言鄉先生同鄉老而致仕者則鄉大夫之爲同鄉現仕者可知矣儀禮言鄉先生鄉中老人爲卿大夫致仕者則鄉大夫爲鄉中卿大夫未致仕者可知矣必重同鄉者死徙無出鄉百姓親睦相保相受相葬相救相賙相賓欲使一鄉之人相好如一家六鄉六遂皆然而後仁義箸教化行本鄉之外恐太廣而不浹本鄉之內不甚遠而易相親故有冠者必見其鄉之已仕致仕者聖人教民之淡意也如賈孔作卿大夫則在朝之卿大夫其可全見與是以陸是而賈孔非也

今若依賈孔之底本改陸氏音香之說改二經作卿大夫則賈孔之底本得矣而於義理乃大乖也就五事論之依今疏作下廸而賈不受也依賈作不廸以改經而攷工經不受也依祭義今疏四郊虞庠而孔不受也依孔作西郊而祭義王制經注不受也依皆未死而賜謚而杜元凱不受也依皆死而賜謚又恐左公不受也依疏作見謂濁而陸不受也依釋文作見渭濁而鄭箋不受也改二疏作鄉大夫而賈孔不受也依疏以改經及釋文作卿大夫而經釋文不受也故按經之法必以賈還賈以孔還孔以陸還陸以杜還杜以鄭還鄭各得其

底本而後判其義理之是非而後經之底本可定而後
經之義理可以徐定不先正注疏釋文之底本則多誣
古人不斷其立說之是非則多誤今人自宋人合正義
釋文於經注而其字不相同者一切改之使同使學而
不思者白首茫如其自負能授經者分別又無眞見故
三合之注疏本似便而易惑久爲經之賊而莫之覺也
如近者顧千里校祭義疏改四郊爲西郊孔氏之底本
得矣而遂欲改注之四郊爲西郊且云王制經注之西
郊不誤是知孔氏之底本而不知鄭氏之底本也鄭氏
之底本失則經之底本亦失而周制四郊小學遂不傳

矣千里又竊余彌時辨劉端臨盧紹弓據二疏改經
大夫爲卿大夫之說著於禮記攷異而未知其詳且又
因宋本之譌字謂賈作鄉不誤是又知經之底本而不
知賈疏之底本也知之者所以辨其非而歸於一是也
東原師云鑿空之弊有一二其一緣辭生訓也其一守譌
傳繆也緣辭生訓者所釋之義非其本義守譌傳繆者
所據之經併非其本經如孔氏虞庠在國西郊所謂所
據之經非其本經也而緣之立說則所釋之義非其本
義矣經文之不誤者尙懼緣辭生訓所釋非其本義況
守譌傳繆之經耶孔氏守唐時譌繆之本千里又守孔

氏所守至於古本之是者確有可據而不之信信孔以
誣鄭誣鄭以誣經不大爲經之害也哉凡校經者貴求
其是而已以祭義注四郊虞庠謂之四學正王制經注
之西郊爲四郊攷之大戴禮王肅劉芳皇侃崔靈恩杜
佑諸家而無不合以排孔氏之疏繆所謂求其是也執
事以爲何如

與陳仲魚書

仲魚足下借閱文選攷異是非皆意必之談其謂尤延之所增改尤多不確今略爲足下言之文賦故踳踔於短垣今各本作韵放庸音以足曲李注廣雅曰蹠蹠無常也云云國語曰有短垣君不踰顧千里云袁本茶陵本作韵不著校語注中國語曰九字二本亦無之恐尤改未必是也愚按延之卽改字亦當不過音同形異者耳何敢突改正文短韵爲短垣雖妄不至此其不可信一也國語曰九字倘謂古本所無故袁茶陵本無之然則竟是延之硬添此九字雖妄不至此其不可信二也

改正文爲垣而以國語短垣爲之注雖天下大妄人亦不至此其不可信三也考國語各本皆作君有短垣而自踰之果是延之僞注則所引亦當同不應乖異其不可信四也蹠踔謂脚長短也短垣可云蹠躅不進不得施於短韵其不可信五也賦上文既云或託言於短韵此不應又曰於短韵是寫書者涉上文而誤耳而尤本獨得之其不可信六也袁茶陵二本殆其所據賦本作短韵淺人因刪此注九字而千里不悟其不可信七也汲古閣正文作韵而注有此九字較勝於袁茶陵本而千里不悟其不可信八也錢牧翁爲吳梅村作文集序

用蹠蹠短垣是其所據乃古本其不可信九也足下所
得明仿宋刻一陸集作短垣其不可信十也據此十條
可知尤之被誣矣尤自跋云李善淹貫該洽號爲精詳
四明贛上各嘗刊勒往往裁節語句可恨此注九字正
所謂裁節可恨者也而謂延之爲之乎蜀都賦濱以潛
沫蜀都賦本作濱與別千里不能正劉淵林注曰禹貢梁州云蒞潛既
道有水從漢中汎陽縣南流至梓潼漢壽縣入大穴俗無大字千
里不能正通岡山下西南潛出今名伏水俗本伏作複舊說舊說
云禹貢潛水也千里云漢中二字不當有汎陽當作江
陽愚按江陽者今之直隸瀘州雜水入大江之處卽賦下文

浸以水經所謂江又過江陽縣南洛水洛卽雒水從三危山縣雒

東過廣魏縣南東南注之者也潛水在今重慶府入大江重慶者古之巴郡江州縣重慶府上距瀘州約四百里水經所謂

江至巴郡江州縣東強水涪水漢水白水宕渠水五水合南流注之者也酈注云宕渠水卽潛水渝水矣乃欲改漢中洒陽四字爲江陽二字不知江陽者雒水入江之處非潛水自北而南發源之處也倘云江陽至漢壽則是由今瀘州逆流至今廣元縣自南而北水將何入乎水經潛水出巴郡宕渠縣酈云潛水蓋漢水支分潛出故受其稱耳今爰有大穴潛水入焉通岡山下西南

潛出謂之伏水或以爲古之潛水引鄭元曰漢別爲潛其穴本小水積成澤流與漢合大禹自導漢疏通卽爲西漢水也故書曰沱潛旣道又桓水篇酈注曰自葭萌入於西漢卽禹貢之所謂潛水者也自西漢溯流而届於晉壽界沮灑枝津南厯岡穴迤邐而接漢入濂水所謂浮潛而遯涵矣又濂水篇酈注曰劉澄之云有水自沁陽縣南至梓潼漢壽入大穴暗通岡山郭景純亦言是矣岡山穴小本不容水水成大澤而流與漢合酈三言岡穴皆謂此潛水卽西漢水也岡山卽今保寧府廣元縣神宣驛之龍洞背其水穿穴而出合嘉陵江者也

酈謂潛水本漢水支分潛出此賦淵林注云從漢中沔陽南流至漢壽卽酈說所本漢中沔陽本不誤永樂大典水經注劉澄之云從阿陽縣南至梓潼漢壽與淵林小異要斷不可作江陽也至若郡國志犍爲郡江陽縣下云蜀都賦注云卽引淵林注也沱潛既道從縣南流至漢嘉縣入大穴中通岡山下因南潛出今名復出水此引淵林潛水注而縣南二字之上奪漢中沔陽四字漢壽譌漢嘉西南譌因南伏水作復出水夫江陽乃洛水入江之處劉昭引華陽國志江雒會不誤矣而不審淵林謂潛水卽宕渠水在江州縣入江者而引以證江陽入江

之雒水已爲巨謬乃又據奪誤之從縣南三字謂此水
從江陽縣南至漢壽用以改正淵林注之從漢中沔陽
至漢壽終中生繆於地理斷不可通矣漾水篇酈注曰
葭萌城劉備改曰漢壽太康中又曰晉壽改漢壽作晉
壽可也但郭璞爾雅音義劉澄之永初山川記亦作漢
壽則古人不拘也吳都賦其竹則貢簷林於桂箭射筒
淵林注云射筒竹細小通長當作通中長丈餘亦無節可以
爲射筒筒及由梧皆出交趾九真筒上奪射字于里因之生誤千里
不知奪一射字以射字乙置筒字下云射筒當作筒射
各本皆倒筒句絕射下屬此但可以爲筒百非單名筒

也愚按正文以竹名類廁竹名射筒無疑也謂之射筒者筒者通簫也引申之凡通中者曰筒此竹長丈餘而無節與上文箭竹細小勁實可以爲箭通竿無節正同故云亦無節惟箭竹實中無節此通中無節通中而宜作矢故謂之射筒曰可以爲射筒者竹名矢名皆曰射筒猶竹名矢名皆曰箭也千里乃云此竹可以爲筒不知作何等筒且射字何解平戴凱之竹譜曰射筒薄肌而最長節中貯箭因以爲名節中貯箭不可通未聞每矢爲一筒箇之者且淵林云無節此云有節與淵林注異要亦以射筒爲竹名不云可以爲筒也又吳都賦楠

櫟之木淵林注云楠櫟木之盤結者其盤節文尤好可
以作器建安所出最大長也千里云楠當作南南櫟複
二字爲一木名與柟之別體作楠無涉誤也愚按不誤
特柟之俗耳櫟乃瘤之誤俗閒傳寫失之柟瘤之木猶
今人云癭木也癭木多柟樹所生故曰柟瘤四川癭木
器物皆出於柟想建安亦多此也古有爲楠櫟枕賦者
爲楠櫟枕銘者瘤皆誤櫟瘤者腫也癭者頸瘤也木之
瘤似人之贅疣庾子山枯樹賦云戴癭銜瘤淵林云建
安所出最大長謂其癭瘤最大也章樵云木結成癭
大如榜柂車輪者割之有文千里乃欲改柟爲南合

二字爲木名肥爲之說凡其考異觸目多誤而漢中沔陽一條尤可徵其懵懵於地理惟大雅鑒定之玉裁白

邢昺爾雅疏引郭璞爾雅音義云有水從漢中沔陽

南流至梓潼漢壽入大穴中通峒山下

按峒字集韻徒弄切山穴

也通作洞今廣元縣龍洞背其山通中過水是也然則峒字不誤而吳都賦劉逵注作通岡山下水經注潛水篇作通岡山下漾水篇注及郡國志注引劉逵語皆作通岡桓水篇作岡穴則又當三占從二也

西南潛出一名沔水舊俗云卽禹貢之潛也按郭語

與劉逵劉澄之語先後合契而郭云自漢中沔陽南流劉澄之亦曰自沔陽南至則漢中沔陽四字確不可移永樂大典本劉澄之語作自阿陽者誤也漾水

注引澄之語下卽云郭景純亦言是矣卽謂爾雅音義也古人皆謂西漢東漢是一水故謂河水自漢中沛陽分枝西南流至漢壽爲西漢卽禹貢之潛酈善長曰潛水蓋漢水枝分潛出故受其稱耳胡東樵云依地勢東高西下然則自沛陽西南流至漢壽無疑劉郭所謂南流者西南流也

吳都賦蕉葛竹越解

今本吳都賦蕉葛升越弱於羅紈注曰蕉葛葛之細者升越越之細者此注節首無善曰字然必非劉淵林注也升當爲竹蕉葛竹越晝然四事請試言之蕉卽芭蕉也藝文類聚引廣志曰芭蕉其皮中莖解散如絲績以爲葛謂之蕉葛南州異物志曰甘蕉取其葉以灰練之績以爲練異物志曰取鏤煮之如絲可紡績爲絲給沈約甘蕉詩曰流甘揜榔實弱縷冠絺衣蘇頌本草圖經云閩人灰理芭蕉皮令錫滑緝以爲布如古之錫蓑焉唐六典江南道建州貢蕉練音疏嶺南道端州謫以蕉布

此蕉布之證也若許氏說文解字云蕉生枲也枲者麻
也可爲布者而生枲未詳許氏列字次第在昔堯薪蒸
四篆下則枲字恐是枲字之誤故列字言得鹿納諸枲
中此枲字本義芭蕉蓋漢人祇作巴且巴焦字不從艸
故不必援生枲爲證也葛布則見於諸經傳詳矣葛者
綿絺艸也竹布一見王符潛夫論浮侈篇曰葛子竹越
筭中女布此四事葛子一也竹一也越一也筭中女布
一也筭中女布見楊雄左思兩蜀都賦後漢書王符傳
載此篇李賢注引沈懷遠南越志云布之品有三有蕉
布有竹子布又有葛焉雖精粗之殊皆同出而異名也

愚按南越志言蕉葛而不言越李賢亦未釋越疎矣
今本潛夫論及後漢書及文選宋本元明本今本皆竹
譌作升由草書二字不別也一見尚書正義禹貢鳥夷
卉服正義引吳都賦蕉葛竹越弱於羅紈孔仲遠不言
竹越爲何物而近日注疏各本亦皆誤作升越莫能諭
正也一見史記夏本紀鳥夷卉服張守節正義曰東南
草服葛越蕉竹之屬此句全用吳都賦而獨作竹不誤
作升又錯互其辭明知竹不與越爲一事一見本賦注
賦曰其竹則簣簷箖箠桂箭射筒此五事簣簷一也箖
箠一也桂一也箭一也射筒一也劉注曰異物志云簣

管生水邊長數丈圍一尺五六寸一節相去六七尺或

相去一丈廬陵界有之箖箊是袁公所與越女試劙者

也桂竹生於始興小桂縣

愚按小桂縣當作桂陽縣晉始興有桂陽縣無小桂縣也

小桂二字涉下文而誤耳因檢太平御覽引山海經桂竹郭璞曰始興小桂縣出桂竹甚疑之及檢中山經固作桂陽縣不知御覽文誤何以同

誤也蓋修御覽時文選注已謬耳

大者圍二尺長四五

尺

此

九字

今各本

誤

在夷

始興

以南

又多

小桂

夷人績

以爲布葛

謂布如葛也按此十六字今各本誤在廬陵界有之下

云小桂者桂竹

之小者也此竹夷人績爲布如葛亦竹布之一證也一

見嵇含南方草木狀云簾竹葉疎而大一節相去五六

尺出九真彼人取織者浸紡績爲布謂之竹練布

第五

太平廣記引顧微廣州記作簾竹卽貢簾也

一見太平御覽引顧微廣州記

平鄉縣有芭竹可爲布一見唐六典嶺南道貢竹布一見元和郡縣志韶州貢竹布十五匹也越者何也紵布

也其字古作越今作紵廣韻曰紵紵布也集韻紵一曰

紵布

宋本紵謂細曹棟亭本不誤

許說爲古義二韵說爲今義卽尙

書禹貢及潛夫論及吳都賦之越也尙書鳥夷卉服孔

傳曰南海島夷艸服葛越孔沖遠不知葛越爲二事但

云葛越南方布名葛爲之以爲一物誤矣張守節夏本

紀正義曰東南草服葛越蕉竹之屬又云越卽苧布也

惟此得越之解唐六典山南道淮南道効南道賦貢皆

以紵愚按紵苧絕然二字說文紵者糸屬以爲布白而
細曰紵鄭君亦曰白而細疏曰紵此其字從系其物江
南甚多其莖如箸高三四尺其葉圓而有尖其皮如麻
可績其艸其布皆曰紵今俗作苧者誤也苧卽說文之
苧字其字從艸說文曰苧艸也可以爲繩廣韻苧同苧
史記上林賦蔣苧青蘋駟引漢書音義曰苧三稜也文
選作苧李善引張揖曰三稜者蘇頌本草圖經所謂葉
似莎草極長莖三稜如削高五六尺莖端開花是也今
江蘇蘆灘中極多俗呼爲馬苧莖可爲索南都賦亦作
苧上林賦五臣作苧云句切誠誤矣玉篇苧苧二同直

與切艸可以爲繩與廣韻集韻畫一竝不誤而千里乃
云玉篇芋苧同顧希馮受其誣矣又云三稜與上林之
芋實異名同不可援以相證不知上林說文同此一芋
同是三稜可爲繩而芋爲正體苧爲或體耳不可云芋
苧異物不可云上林苧爲譌字也南都賦李注引說文
苧可以爲索非卽說文之苧可以爲繩乎賦云弱於羅
紈者謂四物以艸竹爲之而膩於蠶絲所成故王符以
與細綈綺縠冰紈錦繡並稱而葛子竹越居首也原注
以蕉葛竹越爲二事斷非出於淵林張劉注本皆太沖
自爲之不應錯繆如此若謂出於李善則亦疏陋

又按孔氏尚書傳乃東晉南朝人僞爲之卽葛越二字可見二字取諸左賦不取蕉竹者亦不知其解亦如劉注以爲二事也

庚午中秋日記

按越字見禮記左傳禮器大路素而越席郊特牲莞簾之安而蒲越橐軎之尚桓二年傳大路越席昭其儉也杜預曰越席結草孔穎達曰越席蒲席蓋古結草爲席曰越因之用紵草成布亦曰越舊讀如活今讀如曰此越字之源也舊因活者禮記華而曉鄭曰說者以曉爲刮節目字或爲刮翦蒲爲席以其滑易故謂之越或作趙續紵爲布光滑故亦謂之越皆卽

刮節目之意也清廟之瑟疏越瑟底孔滑潤故亦謂
之越音活

使乎使乎解 辛未

論語使乎使乎自來不得其解當以使乎使二字爲退
下一乎字爲永歎之語助曰何也曰是尙書孝乎惟孝
禮記仲尼燕居禮乎禮之句法也包咸之注論語曰孝
乎惟孝美大孝之辭也李善文選閒居賦注引有大字洪本論語無大字非也美大雙
字公羊傳曰登來之者何美大之之辭也語意同之辭也三字最當玩謂古人屬辭如此禮記子貢
曰敢問將何以爲此中者也子曰禮乎禮鄭注云禮乎
禮惟有禮也二注互相發明言專壹於孝專壹於禮以
老子言元之又元眾妙之門通之彼亦可作元乎元此
亦可作孝之又孝禮之又禮蓋一字不足以盡其美疊

一字以美之謂孝迥出乎凡孝禮迥出乎尋常守禮皆
古人聿聿頤好之辭有孟子出於其類拔乎其萃之意
焉使乎使謂好使中之好使也古人多有此句法公羊
傳云賤乎賤者也謂盜爲賤中之賤者也爾雅釋訓微
乎微者也謂式微式微言微而又微也法言才乎才謂
儀秦才而又才但非聖人所謂才耳其他有習乎習裸
乎裸辰乎辰素問形乎形神乎神史記淮陰侯列傳時
乎時詞意畧同聖人言使乎使正此句法下以乎字咏
歎之正與賤乎賤者也微乎微者也文法一例不可以
上使乎迺下使乎句